

東
華
續
錄

東華續錄

道光三十五

臣王先謙敬編

臣周潤蕃恭校

道光十七年丁酉春正月己卯朔以奕紀爲御前大臣○賞長齡
四開襖袍潘世恩太子太保僧格林沁黃糧○丙戌諭國家設立
營伍訓練操防原期有備無患而兵丁之能否得力實當慎之於
挑缺之先茲據孟魁奏稱廣州每年彙報部旗挑選兵丁缺冊僅
用姓名頂補字樣並不註明年歲易啓遷就之弊等語兵丁冊報
部旗原所以資考覈僅以姓名更換其弊不可勝言廣州如此他
省恐亦不免嗣後各直省彙報部旗缺冊著卽註明年歲毋許含
混儻仍用姓名頂補字樣並不註明年歲著該部旗卽行駁斥更
換以昭覈實而肅戎行○諭孟魁奏請除駐防積習一摺我朝修

明武備以騎射爲先該管大臣平日勤加訓練挑選差使破除情面方足以成勁旅而資捍衛茲據孟魁奏上年四月閒前赴教場挑缺該協領佐領等以計較家口養贍爲重不論騎射之強弱積習相沿牢不可破且查明未及成丁而食錢糧者有九十餘名甚至騰那底缺弊竇滋多實屬喪良違例蘇勒芳阿孟魁俱到任未久自無所用其回護更不准稍事隱飾知而不言協領海俊佐領色勒敏如何含糊蒙混著卽查明嚴參懲辦嗣後凡遇挑缺總當以人材精壯箭射有準者充選不得以養贍戶口藉詞調劑以致有名無實儻因循姑息仍蹈前轍惟該將軍副都統是問決不寬貸○壬辰兵部尙書王宗誠卒予祭葬○以朱士彥爲兵部尙書

署吏部尙書

○癸巳諭奕綵已承嗣慶郡王爵縣愍前經有旨加恩令

其承襲郡王毋庸帶領引見因念縣悌縣性係朕叔慶僖親王之

子朕敬仰體

皇考友于之誼允宜渥沛恩施晉加一等縣悌著

加恩封爲不入八分鎮國公縣性著加恩封爲不入八分輔國公

縣悌縣性務當仰體朕意慎勉趨公以副朕篤念懿親成全造就

至意毋忽○乙未命慶郡王奕綵在御前行走○召楊殿邦來京

以陳繼昌爲山西布政使管通羣爲江西按察使

由長蘆鹽運使遷

○丙

申諭軍機大臣等據鄧廷楨奏稱英吉利國公司散局以後大班

不來上年十一月內該國特派遠職來粵總管本國前來貿易之

商賈水手等語該國來船絡繹自應鈐束得人以期綏靜今既領

有公書文憑派令經管商情事務雖與向派大班名目不同其爲

鈐束則一著准其依照從前大班來粵章程至省照料並飭令粵

海關監督給領紅牌進省以後住澳住省一切循照舊章不准逾

期逗留致開盤踞之漸該督等正可藉此責成彈壓不准干預滋

事仍應密飭該管文武及洋商等隨時認真訪察儻越分妄爲或有句結漢奸營私亂法情事立即驅逐回國以絕弊源○庚子諭三歲考績乃激揚大典滿漢諸臣有能實心實力克稱厥職者自當甄敘平庸不能勝任者亦難姑容茲屆京察之期吏部將京外諸臣開單題奏朕詳加酌覈大學士長齡宣力多年年登八十而精神強健大學士潘世恩穆彰阿協辦大學士王鼎克勤克敬不愧贊襄吏部尙書湯金釗品學醇正奉使公明刑部尙書史致儼精力如常刑名詳慎協辦大學士直隸總督琦善辦事認真營伍整飭陝甘總督瑚松額不露鋒鋷細心認事雲貴總督伊里布熟悉邊務鎮撫得宜江南河道總督麟慶修防無誤獲保安瀾俱著加恩交部議敘內閣學士桂森廉率無能不堪造就著以二等侍衛降補盛京工部侍郎奕澤才具平庸不勝侍郎之任著以頭等

侍衛降補湖廣總督訥爾經額兩省文武是其統轄乃么磨小醜
日久不獲既失察於前復玩泄於後實屬無能著降補湖南巡撫
再予限一年緝拏藍正樽務獲以觀後效餘著照舊供職至兩江
總督陶澍辦事勇敢但鹽務尙未大見起色閩浙總督鍾祥精明
沈細兩廣總督鄧廷楨才學俱可山西巡撫申啓賢辦事實心皆
履任未久諸臣務當清慎持躬公勤莅事朕有厚望焉○以林則
徐爲湖廣總督調陳鑾爲江蘇巡撫裕泰爲江西巡撫由湖南調○調
功普爲盛京工部侍郎以文德和爲理藩院右侍郎由內閣學士遷○甲
辰諭軍機大臣等興德等奏查探霍罕賊目列什格爾胡什伯克
業經旋回並見在卡外色喀庫勒地方仍有賊人占據情形一摺
據稱霍罕伯克已將胡什伯克調回胡什伯克於回去之便沿途
逗留在喀什噶爾英吉沙爾卡外一帶各布魯特愛曼妄肆煽惑

復遣人致信於西皮察克愛曼布嚕特比愛里雅爾亦係句引之詞該布嚕特比愛里雅爾素稱恭順未肯聽從見在胡什伯克率領賊眾旋回霍罕仍留賊目阿達那帶領二百餘人在塔什霍罕塔哈爾瑪莊等處居住勾結布嚕特在附近地方往來騷擾色呼庫勒伊什罕伯克仍在通莊防堵各等語控制外夷總以不動聲色慎守邊防俾外夷震懾天威潛消覬覦方爲有備無患上年所降諭旨甚爲明晰著奕山等仍遵前旨鎮靜防守一面差派員弁嚴巡各卡倫一體防範總不輕舉妄動出卡滋事是爲至要○戊申諭鹽引暢銷總期裕課便民各該督撫奉公盡職原應不分畛域而所轄引地亦宜劃清界限以杜侵越方爲辦理妥協茲據陶澍奏稱安徽之徽州府與江西之廣信府例食浙鹽均在兩省腹地私鹽由漸灌入以致安徽江西各府均被侵占在浙商總以便

民食爲詞每於徽州廣信等府界開設私店而淮鹽受害漸有侵
占之虞著烏爾恭額嚴查奸商禁止偷販除假公濟私之弊杜越
境售私之習整頓自爲得力各省一體照辦俾行鹽則各依疆界
緝私則無分彼此庶鹺務日有起色而轉銷各有責成矣○是月
貸山西朔州等十一州廳縣陝西葭州等九州縣甘肅金州等十
三州縣並莊浪縣丞所屬水災旱災蝗災雹災霜災倉穀口糧籽
種緩徵直隸西甯縣山東德州等二十三州縣衛水災旱災額賦
江蘇高郵等三十二州縣衛通賦展緩直隸景州等十一州縣通
賦

二月庚戌、上御經筵○庚申召圖明額來京以瑞元爲山西按

察使

由福建
程道遷

○甲戌諭嗣後凡京堂御史緣案降補以及原係京

職降調補官指明以何官降補或仍回本任並廢員起用捐復降

捐人員如係一體升轉其原案內並無不勝外任及奉特旨停升者計俸合例俱著准其保送京察一等並著吏部於本內將該員等原案情節詳晰聲敘吏部卽纂入則例通行各該衙門遵照辦理○釋已革都統高喀鼎回京以頭等侍衛休致賞其子已革三等侍衛安興阿克興阿藍翎侍衛○丁丑諭朱士彥等奏查明隨帶司員並無贓私一摺此案解任刑部主事白讓卿於隨帶廣東審案時曾託銀號代寄箱隻解任江蘇蘇松太道陽金城攜帶箱隻至十七隻之多經朱士彥等提同該員家丁等反復研究俱係置買物件委無婪索情弊復檄調巡捕殷輔等質訊食稱實無私謁餽送等情至南雄州知州吳毓鈞奉委進省與白讓卿等素不相識無從進謁查白讓卿等尙無得受苞苴餽賂實蹟惟以隨帶審案司員不知違嫌致滋物議均有應得之咎白讓卿陽金城俱

著交部議處○是月貸山西吉州等七州縣倉穀緩徵山西朔州等二十九州廳縣歉收通穀

三月己卯命定郡王載銓在御前行走○丁亥 上親耕藉田○

琦善丁憂以穆彰阿署直隸總督○庚寅 上奉 皇太后啓鑾

幸髻髻山○免經過地方額賦十分之三○癸巳回鑾○甲午

上奉 皇太后還京師○福州將軍長清卒贈太子太傅○以書

英爲熱河都統倭什訥爲兵部右侍郎明訓爲內閣學士兼禮部

侍郎銜候補內閣學士○陳崇禮以病免以吳榮光爲福建布政使候補四品

堂○乙未 上啓鑾謁明陵○丙申 上詣明長陵獻陵泰陵景

陵永陵奠酒○諭本日朕親至明成祖等五陵酌奠並遣大臣分

詣諸陵行禮懃眺山林松楸無恙敬念 皇祖高宗純皇帝特諭

重修規模煥若 皇考仁宗睿皇帝兩次 親臨酌奠朕仰紹

前模特行親祀凡茲林木蔥鬱殿宇巍巍皆由我朝 列聖德侔

天地以時培護所致朕鑾輅經臨再申禁例著該地方官飭令守

陵人戶敬司灑掃嚴禁砍伐樹木永遠無懈用副朕祇守 前徽

加護勝國陵寢至意○以明後裔延恩侯書桂爲散秩大臣並賞

看守陵戶銀○丁酉 上還京師○辛丑諭予告陝甘總督楊遇

春自乾隆年間以武舉效力戎行每遇軍務無不在事馳驅身經

百戰歷事 三朝懋著勳績前於嘉慶年間平定滑縣賊匪仰蒙

皇考仁宗睿皇帝賞給二等男爵紫禁城騎馬旋晉一等男爵

朕御極後賞加太子少保銜並賞戴雙眼花翎嗣因克復回疆四

城晉加太子太保銜賞用紫韁由提督擢任陝甘總督於邊疆事

務控制得宜老成威望中外皆知恪共忠盡實爲國家股肱心膂

之臣前年因年近八旬舊疾舉發懇請開缺回籍調理朕不忍違

其所請特命來京陛見追念勳勞加恩晉封一等侯爵准其回籍
支食全俸用昭優眷上年冬閒四川總督鄂山來京陛見朕特親
書福壽二字頒發內府人漫十兩令鄂山帶回賞給祇領方冀頤
養林泉永膺祉福茲聞溘逝悼惜難堪披覽遺章不禁垂淚楊遇
春著加恩晉贈太子太傅銜兵部尚書照尚書例賜卹入祀賢良
祠賞給銀二千兩在四川藩庫給發俾得經理喪事任內一切處
分悉予開復應得卹典該衙門察例具奏伊子楊國佐著賞加副
將銜所有應襲侯爵著楊國楨承襲服闋後卽來京陛見以示朕
優卹勳臣有加無已之至意尋賜祭葬諡忠武

夏四月乙卯添設山東魚臺縣千總一南陽鎮外委一爲魚臺汛
協防移原設魚臺汛外委一駐古村集爲滕縣汛協防統歸沙溝
營都司轄○戊午諭朕思爲政之道首戒欺蒙蓋欺則情理不實

蒙則弊端所由作故六部九卿各衙門之公務無論鉅細必當遵
依例案而行遵依例案卽所以防書吏舞文弄法之奸庶可免其
欺蒙也卽如日前兵部議奏三等侍衛男爵克興額一摺旣知按
例應行革職卽當按例具奏不應援引湖廣隨營效力雲騎尉李
紹西仍留世職之事比擬甚屬不倫旗僕侍衛與綠營員弁已難
並論而情理又迥不相同一則弓馬平常一則規避不到其輕重
分明何憤憤若是耶此無他非任聽庸劣司員妄行援引卽堂司
俱受書吏欺蒙矣此事尙無甚緊要若動輒皆然堂官數人止知
依據畫諾漫不經心其患豈可勝言總因不能實心之故也又如
廣東盧應翔一案以尋常之案屢控不休欽差三命成何事體始
而賽尙阿祁墳訊結雖無大錯而所辦甚不切實繼以恩銘趙盛
奎鄧廷楨率意判斷致長刁風在賽尙阿等諒不敢有別情而承

審之員未必皆能清白乃心是賽尙阿等亦難免有被欺蒙之處
奉使者不肯實心苟且從事莫怪乎人之欺蒙也試思萬幾待理
朕曷能纖悉無遺雖居九五之尊心神精力與人同耳念及此惟
增愧增懼孜孜自勉厚望我諸卿奮發振作各盡乃心各揚其職
誠實趨公佐臻上理勿貽後人有欺蒙之誚朕之至願諸卿其善
體苦衷特諭○以柏葰爲內閣學士兼禮部侍郎銜由詹事遷○已未
定發遣宗室給與車輛例○庚申諭軍機大臣等本日據陶澍奏
淮鹺實在情形一摺兩淮鹽務最爲繁重一切催徵催運各事宜
該督責無旁貸已故運司劉萬程竭慮急公本屬職分所當爲見
因病發輕生該督正當督飭新任運司陸蔭奎認真經理期於課
額無虧方爲不負委任何得因劉萬程一人輒謂諸事掣肘遽請
欽派大臣前往查議籌辦此奏殊出意外太不成事總之引課奏

銷原係該督專責如果辦理得宜自可日有起色卽謂兩淮責在督運其督銷之任分寄諸湖廣江西安徽各督撫獨不思江西安徽均係該督統轄省分其應如何實力堵緝趕緊疏銷無難與兩省巡撫妥爲籌辦至湖廣分銷各口岸與淮南本屬一氣相通前

已有旨令林則徐盡心籌畫不分畛域如有應行會議之處儘可隨時咨商從長計議該督受恩深重惟當實心籌辦不得以力單任重爲詞藉圖卸責儻畏難觀望以致離務不見起色朕惟該督是問○申定 皇后以下無所出者無庸載入 玉牒例○癸亥

調隆文爲吏部右侍郎惠吉爲刑部右侍郎以麟魁爲刑部侍郎

由左副都御史遷

○甲子何煊卒以顏伯燾爲雲南巡撫張澧中爲直隸

布政使常恒昌爲福建按察使

由光祿寺少卿遷

○乙丑左副都御史琦

琛以前任坐糧廳失察經紀已滿復充降調○丙寅梁章鉅奏越

南夷匪農洪仁於農文雲滅後復出滋事邀約上下五郎州夷目

攻打久村牧馬報聞○戊辰以德誠善燕俱爲左副都御史

理寺卿善燕由

德誠

太僕寺卿遷

○是月貸山東濮州等二十四州縣衛山西甯武

縣倉穀緩徵山西定襄等三縣額賦並朔州等十七州廳縣通穀
山東濮州等二十四州縣衛通賦

五月戊寅貴慶以病免調奕紀爲禮部尙書以武忠額爲理藩院

尙書奎照爲左都御史調聯順爲工部右侍郎以道慶爲禮部右

侍郎

由內閣學士遷

○己卯賞特亨額都統銜爲葉爾羌參贊大臣以周

天爵署漕運總督

由陝西布政使署

○庚辰以楊振麟爲陝西布政使張

祥河爲河南按察使

由山東糧道遷

○辛巳諭禮部奏各省辦理重赴鹿

鳴筵宴咨奏兩歧一摺恭查嘉慶二十一年奉有 諭旨除三品

以上大員仍准專摺奏請與宴外其四品以下者俱著該督撫咨

報禮部准令與宴等因欽此業經該部纂入科場條例通行各省
在案前據色卜星額奏安徽泗州學正萬保廷並非三品官員何
以該撫仍專摺奏請色卜星額著交部察議嗣後各直省督撫著
仍遵照舊定章程辦理以杜紛歧而昭畫一○甲申調陳繼昌爲
直隸布政使張澧中爲山西布政使○甲辰以那斯洪阿爲內閣
學士兼禮部侍郎銜由通政使司副使遷○是月緩徵山西山陰縣新舊額
賦

六月庚戌諭御史朱成烈奏銀價昂貴流弊日深請飭查辦一摺
所奏甚是銀錢價值兩得其平方於國計民生均無窒礙近來錢
價日賤自係紋銀不足所致推原其故固由於風俗奢侈耗於內
地而禁煙一物貽害尤甚耗銀尤多若如所奏廣東海口每歲出
銀至三千餘萬福建浙江江蘇各海口出銀不下千萬天津海口

出銀亦二千餘萬一入外夷不與中國流通又何怪銀之日短錢之日賤也前據鄧廷楨奏拏獲出洋紋銀業有旨將出力各員弁量加鼓勵並准其將所獲之銀全數充賞惟所拏之數尙不及百分之一且此等奸民情變百出難保不因廣東查拏甚緊遂暗與浙閩諸處交通巧爲透漏是一處之搜拏不足戢眾奸之偷越著直隸山東江蘇浙江福建廣東各省督撫並海口各監督嚴飭所屬文武員弁統於沿海要隘處所隨時隨地認真稽查遇有出洋快蟹等船務當實力巡查儻敢裝載紋銀妄冀偷漏出洋立即設法截拏按律懲辦毋稍輕縱除將搜獲銀兩全數分別充賞外並著查明實在出力各員弁據實保奏請旨鼓勵如有疏縱亦即嚴參懲辦該督撫受恩深重具有天良當思紋銀出洋於國計民生大有關係惟當同心協力不分畛域處處堵緝周密卽有奸民何

從施其伎倆若經此次諄諭之後仍復奉行不力致有奸民吏胥包庇私運出洋不行查拏者別經發覺不特將沿海各員弁從重治罪定將該督撫等嚴行懲處決不寬貸○壬子諭昨因沿海各口岸紋銀出洋於國計民生關係非細已降旨嚴飭沿海各督撫認真查辦該督撫等均受朕厚恩自必共矢忠勤力加整頓但思錮習已久非破格示以勸懲驟難挽回嗣後如該督撫等仍視為具文並不實力查辦必當從嚴懲處其沿海文武員弁巡緝不力甚至書役包庇奸民勾串仍有偷漏卽著該督撫嚴參加等治罪如海口文武員弁果能實力堵緝或連獲數起或破除巨案卽著該督撫據實保奏朕必施恩破格升用以示獎勵自此次諄諭之後該督撫等其各竭誠體國務絕弊源勉副朕力挽頽風至意○戊午命左都御史奎照戶部侍郎文慶在軍機大臣上學習行走

○已未琦善百日孝滿命署直隸總督○壬申諭本日朕恭閱

皇祖高宗純皇帝實錄內載查辦浙省虧空 諭旨仰見 聖謨

不煥炳若日星屬在臣工允宜永遠遵守朕御極以來用人行政

總求一實字方今各直省督撫及方面大員內貪黷營私者尙無

其人而眞能剔弊釐好事事覈實者亦不多見大約自守廉謹則

有餘而率屬嚴明則不足卽如各州縣虧空倉庫一節原當隨時

據實分別懲辦方足以儆奸貪近來虧空各案層見疊出甚至盈

千累萬罔知顧忌其中豈無侵吞官帑私飽囊橐之人何以一經

查辦輒稱因公那移將就了事顯係該督撫司道等不能破除情

而因而設法彌縫爲劣員卸罪地步涓涓不塞將成江河日後釀

成巨案咎將誰執該督撫等豈置身局外耶督撫大吏受恩深重

各宜激發天良嗣後遇有虧空之案總當一秉至公認真確查其

有性近奢華任意揮霍甚或私債累累擅動倉庫者但經查訪得實卽行指名嚴參按律究辦庶懲一儆百俾不肖州縣羣知炯戒有所憚而不敢爲經此次諄諭之後該督撫等儻仍狃於積習一味因循止知見好屬員竟置國家倉庫錢糧於不問則是有心徇庇甘蹈欺蒙將來別經發覺朕惟知執法從事不能倖邀寬典也○四川馬邊廳夷匪滋事命鄂山等剿辦○四川總督鄂山代前任河南巡撫楊國楨奏謝襲侯爵恩得旨覽奏不覺追念先臣英姿雙鑠猶在目前致朕悼惜彌深也○癸酉訥爾經額奏擊獲從逆各犯究出首逆藍正樽被鄉勇毆斃情形命解交林則徐會覈審辦○甲戌奕山等奏上年冬閒胡什伯克在該地方擾亂並留賊目阿達那帶領賊眾在彼占據茲有該處回子吐爾阿沙探得賊目阿達那分派賊眾赴各處擄掠城內僅贖阿達那等八人因

糾約回眾潛入城內將賊目等全數拏獲陸續解赴葉爾羌派員
訊明分別正法命將邊卡準備情形籌畫迅奏○是月貸江蘇淮
安大河二衛被災籽種

東華續錄

道光三十六

臣王先謙敬編

臣周瀚蕃恭校

秋七月壬午浙江巡撫烏爾恭額奏遵旨察看新選温州府知府那興阿堪以勝任得旨應對明敏內務府之長技斷不可墮入彀中慎之○調裕誠爲戶部右侍郎轉聯順爲工部左侍郎以恩桂爲工部右侍郎出內閣學士遷○戊子諭各省將軍副都統皆係朕特加簡用之人於旗營一切利弊原當和衷商推認真查辦方爲無忝厥職近來該將軍副都統內固不乏遇事敢言之員而求其實心任事同寅協恭者亦不多見前因蘇勒芳阿孟魁互相攻訐各執一詞曉曉不已特派寶興馳赴廣東會同鄧廷楨秉公查究嗣據寶興等逐款查明據實覆奏其短少庫銀一節本非蘇勒芳阿任

內之事惟既經查出並不奏明辦理輒以爲數無多率行攤扣辦理實屬錯誤是以照部議降一級調用孟魁所訐各款見經查明虛實參辦惟懸賞招告意圖傾陷居心險詐不正原當重治其罪非僅予革職所能蔽辜姑念其平日於應辦公事尙能留心是以部議上時加恩免其革職仍賞給二等侍衛在大門上行走若並無懸賞招告一節則遇事敢言雖未盡實儘可不加深責朕賞功罰罪一秉大公各省將軍副都統等惟當仰體朕意前除積習遇有旗營緊要公事務當虛心商辦期於共濟不得稍存成見互相攻訐尤不得因此案分別降調遂爾扶同徇隱緘默不言致公事或有貽誤儻經此次諄諭之後仍有玩泄從事不肯認真經理者別經發覺必當加等治罪決不寬貸勿謂誥誡之不豫也○辛卯諭前據御史李純奏請將東河甄工暫停燒造當有旨派敕徵馳

往查辦並命李燕隨同前往茲據該尙書查明具奏所議甚是據稱道光十五年該河督栗毓美因原陽一帶隄工喫重本係無工處所物料不備卽時收買民輒拋築擋護試有成效因欲多辦輒工以期減埽節費該尙書周歷履勘下北祥河等廳拋成蟄定之工壓蓋碎石跟澆土截見在尙屬整齊並據各道廳密稟水淺溜緩之處拋輒壓石以及保灘護厓均堪得力其水深溜急之處有輒石並用放手加拋始經站定者有屢拋屢塌改用埽工方能穩固者用輒搶辦險工未可深恃等語治河之法不外以土制水取其柔能抵剛碎石質重體堅用以防風護埽亦得剛以濟柔之義輒本土成原可濟料石之不足於河工亦不無裨益該河督前請沿隄立窯燒造新輒本爲搶辦要工起見惟土性沙城坯難堅實且近隄例有取土之禁近料宜防意外之虞行之日久流弊滋多

是燒甃不如採石之無弊用甃不如用石之一勞永逸也著粟毓
美卽將已拋甃工酌量壓石澆土以期穩固所有未拋之甃嚴飭
道廳員弁確切報明存貯河干以備應用毋庸再行燒造以符舊
制而杜弊端○癸巳重修圓明園三殿成 御製記曰予自踐阼
以來於今十有七年兢兢業業惟慮政治之未修民生之未裕一
切興作概從簡略非慕卑宮之名惜露臺之費蓋事必權其緩急
心必戒夫逸豫惟懷永圖不敢不慎也若今者圓明園三殿之重
修蓋有說焉三殿者前曰圓明園中曰奉三無私後曰九洲清晏
溯自 聖祖賜額 世宗定居 皇祖 皇考因循守樸不改成
規爰逮藐躬德輔任重亦惟祗承基緒曷敢不念負荷之艱乃以
丙申九月二十六日戌亥之交融風告警鬱攸從之雖綆缶有備
而塗徹已多予心怵惕不遑啓處惟茲三殿乃 祖 宗締構所

貽居御園之中爲寢興之所非若山茨水檻僅備游觀若不及時
修復何以自安爰命內府諸臣庀材鳩功繕完補闕惟期示儉於
後不敢增美於前工未逾年制已復舊於以昭不彫不斲之風亦
以守不愆不忘之志版築之興洵不得已也抑予之說更有進焉
周書大誥梓材兩言作室旣底法矣繼之曰肯堂肯構旣勤垣墉
矣繼之曰塗墍茨自古帝王肇造丕基規模遠大非第令後世無
以加也亦謂數傳而後其張弛損益因乎時存乎人焉故勅業務
期可繼而守成亦貴有爲若因循翫泄有廢莫舉所謂堂構塗墍
者安在耶然非值必不可緩之事有必不可已之心動輒更張矜
言改作則前人底法之善必至紛然失其所守其弊更有不可勝
言者是舉也惟願我後人念作室之不易則圖易而思艱睹寢成
之孔安則居安而慮殆慎憲省成庶幾乎無廢事焉且知官室之

制度已備國家之經費有常工不可以拊興役不可以輕舉持盈保泰庶幾乎無侈心焉夫無廢事勤也無侈心儉也勤者治之本儉者福之源也繼自今以引以翼攸芋攸躋鑒成憲以無愆輦洪圖於勿替是則予之厚望也夫工既竣乃述顛末而爲之記○丁酉諭前據御史黃樂之奏請將山東鹽務改歸巡撫統轄當降旨交戶部議奏嗣據該部議准請歸巡撫管理復諭令經額布妥議具奏本日據該撫奏稱該省鹽務見當設法清楚之際非就近督催難期得力鹽政駐紮天津相隔千里遇有籌議事件稟函往返動須月餘實屬鞭長莫及等語山東鹽務著卽改歸巡撫管理以歸簡易其前經奏准章程各條務當實力奉行認真經理如有應行損益之處著該撫隨時督同藩臬運三司悉心講求總期裕課疏綱日有起色仍符年清年款舊制其運庫出納尤宜留心查察

不准再有懸款備經此次更定章程之後辦理仍無成效朕惟該

撫是問○壬寅陳繼昌以病免以托渾布爲山西布政使熊常緯

爲直隸按察使

由山西冀南道遷

○是月緩徵江蘇鹽城縣挑河貸款

八月丁未戶部右侍郎程恩澤卒賞其子德威舉人○調祁寓藻

爲戶部左侍郎以吳其濬爲兵部左侍郎

由內閣學士遷

○甲寅諭奕紀

等參奏值班大臣曠誤道慶奕興既有值班差使自應輪流值宿

以昭慎重據奕紀等查明誤班日期道慶在先其咎較重奕興次

之道慶著革去禮部侍郎退出御前侍衛著在乾清門行走毋庸

管理圓明園奕興著罰俸六箇月以示懲儆○以連貴爲禮部石

侍郎道慶爲內閣學士兼禮部侍郎銜○丙寅以毛樹棠爲內閣

學士兼禮部侍郎銜

由詹事遷

○戊辰成都將軍凱音布等奏遵查夷

匪起釁緣由及飭辦情形查馬邊廳屬夷地與雷波屏山接壤等

廳縣接壤環繞涼山此次該夷等因阿什子家黑夷三和與大烏拋家黑夷熟果互打冤家起釁擾及內地遂有乏食夷支乘機附和在毗連老林居民場市肆行焚搶並有漢奸熟夷從中勾結該夷恃山高箐密可以藏匿兵退復來習爲故常見將沿邊匪匪悉行捕滅嚴飭該鎮等相機籌度實力窮搜以免後患報聞○甲戌諭軍機大臣等關聖保等奏廓爾喀年貢到藏起程日期一摺又另片奏該國王例進貢物逐一查點與上屆相符惟另有小銅礮一尊又洋鏡洋表珊瑚璣片等件共七箱據該噶箕等稟稱銅礮係該國王另外呈進其洋鏡等物係該國王之妻呈進等語此次該國王於例貢之外另進貢物自係倍加恭順惟天朝撫馭外藩具有定制例進貢物應仍照舊章辦理其額外進呈各件著該大臣等妥爲存貯俟該噶箕等同國時仍令將原物帶回並著該大

臣等向該噶箕等告以天朝制度俱係照例辦理爾國王之妻向無呈進貢物之例業經代爲奏明大皇帝以爾國王恭順可嘉格外體恤年例貢物照舊賞收是爾國王向化悃誠已蒙洞鑒所有另行呈進及爾國王之妻呈進各件仍交爾等帶回嗣後爾國王務當仰體大皇帝愛惜爾國民力之意毋再額外貢獻以符定制至該國王求賞銀兩之處俟該噶箕等到京進表時再降諭旨○是月緩徵甘肅皋蘭等四縣暨東樂縣丞所屬被災新舊額賦

九月丙子朔諭鄧廷楨等奏請復承商舊例一摺粵東洋商自嘉慶年間設立總商經理其選充新商責令總散各商聯名保結後因夷船日多行戶日少照料難周易滋弊竇是以量爲變通准以殷戶自請充商暫行試辦停止聯名保結之例茲據該督等查明見在招補缺商已復舊額足敷辦公自應仍復舊例以示限制嗣

後該商遇有歇業或緣事黜退者方准隨時招補此外不得無故添設一商亦不必限年試辦以歸覈實其承商之時責令通關總散各商公同慎選殷實公正之人聯名保結專案咨部著充並著該督等隨時查察毋許該總商等仍蹈從前推諉壟斷惡習俾保充者務求覈實而走私漏稅諸弊亦實有攸歸以裕課餉而杜奸私○丁丑以松峻爲內閣學士兼禮部侍郎銜由詹事選○己卯張祥河丁憂以成世瑄爲河南按察使由江南江安糧道遷○庚辰諭軍機大臣等本日據奕山關福馳奏查辦色喀庫勒情形並霍罕遣使遞稟悔罪輸誠及發給該伯克回諭並將該伯克原稟譯漢呈覽所奏具悉上年冬閒霍罕胡什伯克在色喀庫勒地方滋擾占據嗣經該處回子將賊目阿達那等八人拏解葉爾羌經該參贊等訊明正法當有旨令奕山等將見辦情形迅速具奏茲據奏稱該參贊

等前於四月二十八日撰給諭帖一道發交呼岱達派人送往見據霍罕伯克差派夷使木特拉隨同呼岱達阿布都烏舒爾來至葉爾羌投遞稟帖譯出原稟該伯克情詞甚屬恭順並無狡強且於阿達那被擒一事未敢提及稟內並稱再不准我們的人往卡內騷擾地方等語霍罕伯克遣使遞稟悔罪輸誠見經該參贊等酌加賞賚派送卡並發給諭帖一道又據色喀庫勒回子邁瑪托胡達等四人由卡外逃回據稱列什格爾說阿達那騷擾被擊此係自取並經該參贊等探明色喀庫勒塔哈爾瑪莊等處並無賊人占據地方見已空閒此等回衆大羊性成情多反覆見在雖甚恭順防範仍不可稍懈著該參贊等隨時體察情形嚴密防守總期永臻安靜無稍滋生事端方爲安邊長策其色喀庫勒回衆前有逃至通莊躲避並遷住卡內者著卽悉心籌畫妥爲曉諭飭

令照舊遷回故土復還本業毋得日久逗留卡內嗣後發給霍罕諭帖時止須申明大義杜其窺探之私不必再用大兵出卡字樣奕山接奉此旨如一切事件俱已辦竣著卽旋回伊犁參贊本任恩特亨額抵任後卽將此旨交給閱看務當通籌全局揆度情形使一應防邊要務悉臻妥善方爲不負委任○壬午諭國家設官分職大小相維督撫職在封疆責任綦重凡屬員之賢否自當隨時查察無稍徇隱至各省藩臬道府人數無多考覈尤易從前乾隆年間特頒諭旨令各督撫年終密封具奏一次原以嚴考察而備簡用該督等宜如何破除情面於密註考語時字字覈實不稍假借以副國家旌別淑慝之望乃近年各督撫視爲具文僅以一奏塞責經朕留心察看往往與所註密考大不相符卽如江南河庫道李湘蒞在任多年庫款出入是其專責見經欽派尙書朱

士彥馳往查辦據稱款目牽混輻輳不清是該員才難勝任已不待言檢查道光十五年林則徐密封內稱該員明練樸誠辦事細緻十六年開陶澍密封內又稱該員心地明白謹飭安詳似此支銷出入種種錯誤尙得謂之細緻明白乎可見該督等平日非隱受欺蒙卽意存瞻徇於興賢去不肖之義漠不關心是上以誠求下不以實應殊失朕望除將李湘莖革職示懲外陶澍林則徐均著交部議處嗣後各省督撫惟當仰體朕用人之苦心事事求一實字其考察屬吏尤應就其所辦公事認真稽覈一秉至公儻再狃於積習虛應故事不肯據實註考則是有心欺罔將來別經發覺定將該督撫等嚴行懲處不貸毋謂朕語誠之不豫也○乙酉諭昨因陶澍林則徐於河庫道李湘莖註考不實降旨交部議處茲據吏部照例議以降二級調用實屬咎所應得朕不難卽予降

調並非簡用乏人惟念究係年終循例註考與特保者尙屬有閒
陶澍林則徐均著加恩改爲降四級留任不准抵銷嗣後各直省
督撫務當振刷精神各盡厥職於興賢去不肖之道尤宜細心講
求俾收得人之效儻年終註考仍不能詳慎覈實致涉蒙混掩飾
或意存瞻徇一經發覺朕必將該督撫等從重懲處決不稍貸○
己丑移四川崇慶州汛左哨千總爲邛州千總仍歸城守右營守
備轄右哨頭司外委爲新都縣汛右哨二司把總改歸城守左營
守備轄新都縣汛右哨頭司把總爲崇慶州汛左哨頭司把總歸
城守右營守備轄○庚寅實授周天爵清運總督○癸巳翰林則
徐等奏覈審毆斃首逆情形一摺前據納爾經額奏擊獲從逆各
犯供出首逆藍正構已被鄉勇漆國良等毆斃當降旨著林則徐
覈實研究不准以疑似之詞消弭遷就茲據林則徐等奏藍正構

被鄉勇追趕與兩賊同逃該逆等同時殲斃該二賊身上衣物被
眾扯散獨將藍逆屍身剝去大衫小帽並解其所帶火鑪煤管各
一件旋據逆妻逆子藍明玉逆女藍秀蘭及從逆之鍾順二並鄉
勇等均分別認明實係該逆生前所用衣物該逆彼時混入賊夥
鄉勇毆斃三賊時藍逆在內等語當鄉勇追賊時搶取死賊衣物
俱已扯散何以藍逆衫帽等件尙復完全留爲日後證據近於裝
點且火鑪等件俱係尋常用物到處皆有破衣縫補並非罕見何
以逆妻遽認係其縫補逆子逆女年僅八歲十二歲何以一見遂
認爲其父之物種種疑竇欲蓋彌彰且據奏稱衣物在鄉勇處存
留直至拏獲鍾順二等供出毆斃情形始取出呈驗零星小物已
難爲憑況事隔年餘遽以此爲該逆毆斃實據尤爲不近情理訥
爾經額身任封疆受恩深重於此等要犯日久稽誅及予限查拏

又不能迅速緝獲明正典刑在藍正樽么磨小醜原屬無足重輕
今乃以被毆致斃草率完案儻日後他處拏獲該撫自問當得何
罪訥爾經額疲輓無能智窮詐生不勝巡撫之任著交部嚴加議
處卽來京聽候部議湖南巡撫著襲綬暫行護理林則徐平日辦
事尙屬認真故將此案特交詳鞫乃以事非本任與己無干遽隨
同附和遷就了事甚非覈實辦公以誠事君之道蓋外任之惡習
沾染日深不自知其爲非林則徐亦著交部議處嗣後務當振刷
精神勉副委任至另摺奏審擬逆案餘匪鍾順二一犯旣係從逆
要犯審明後卽應正法止因係藍逆毆斃要證尙留請旨其意蓋
以證據見存並未殺之滅口巧則巧矣誠實二字安在鍾順二著
卽正法餘著刑部議奏其該逆緣坐妻子卽著照例定擬完結在
逃之逆子藍琢玉著該地方官嚴密查拏毋任漏網○甲午以錢

寶琛爲湖南巡撫程昶未爲浙江布政使

服闋布政使

○戊戌諭前因

訥爾經額於逆匪藍正樽日久稽誅追予限查拏又不能迅速緝獲明正典刑乃以被毆致斃支飾完案林則徐隨同附和遷就了事當降旨交部分別嚴加議處茲據該部奏請將訥爾經額照滿職例革職林則徐降三級調用均屬咎所應得惟訥爾經額年力正強若竟予罷斥轉得置身安閒著賞給三等侍衛作爲駐藏辦事大臣換回鄂順安訥爾經額接奉此旨卽由驛起程前往不准來京林則徐著加恩改爲降五級留任不准抵銷○諭軍機大臣等鄧廷楨等奏諭逐疊船並籌議拏辦窩口走私章程一摺據奏英吉利等國躉船貨船近年藉詞避風駛入內洋見已諭飭洋商傳諭該國領事將伶仃等處洋面寄泊躉船概行遣令回國毋許仍前寄泊逗留並飭總商等俟躉船開行回國卽行稟報查考其

快蟹一項業已盡淨而走私匪艇名目尙多實與窩口奸徒均屬難容已飭道府標鎮協營嚴督所屬巡邏查緝等語夷船停泊內洋句結偷漏爲粵省之積弊該督等諭飭以後該領事是否遵奉見在躉船會否開行務須確實查明令其全數回國無稍逗留如敢將就了事日後經朕訪聞或被入糾參朕惟該督等是問至各項走私船隻尤須設法嚴拏期於根株盡絕亦不得因偶有獲案遂謂驅除已盡仍貽弊竇也○甲辰免直隸阜城邢臺二縣被旱額賦十分之一○是月緩徵直隸景州等四十一州縣山東濟甯等四十一州縣暨各屯衛水災旱災雹災新舊額賦

冬十月丙午

上臨大學士公長齡第視疾

○乙卯轉王植爲禮

部左侍郎以吳文鎔爲禮部右侍郎

由內閣學士遷

○己未以培成爲內

閣學士兼禮部侍郎銜

田乾清門頭等侍衛遷

○戊辰內務府大臣奏遵

逃走太監治罪章程太監逃至河南山東山西及東三省枷號一年發往黑龍江給官員爲奴遇赦不赦如逃至各省卽係越省違屬永遠枷號禁斃另有案情從重辦理仍將容留之人治罪如止逃回順天直隸本籍者照舊例辦理逃往別州縣離本籍五百里以外枷號六箇月發往打牲烏拉給官員爲奴三年釋回如復行逃走卽照逃往河南山東山西東三省之例治罪從之○辛未停吉林採珠例貢○甲戌調花杰爲江西布政使李恩繹爲廣西布政使○是月給陝西保安縣被災籽種口糧並貸穀德等四州縣倉穀蠲緩山西應州等十州縣齊齊哈爾等三城被災新舊額賦緩徵江西建昌新建二縣河南睢州等二十一州縣湖北沔陽等二十一州縣暨各屯衛湖南華容等五縣並岳州衛安徽泗州等三十七州縣暨各屯衛陝西綏德等五州縣被災新舊額賦

十一月丙子諭前因各衙門保送內閣侍讀學士除戶部郎中寶壽外皆非京察一等人員當降旨著吏部妥議章程具奏茲據奏稱查覈各條例內所載不一以致各衙門歷次保送不無參差嗣後內閣滿洲侍讀學士通政使司參議光祿寺少卿鴻臚寺少卿並內閣蒙古侍讀學士各項京堂缺出輪應部員升用著各衙門先儘一等人員揀選保送如一等無人或一等人員另有不合例事故及出各項差使方准保送二等人員其應保舉二員者如該衙門一等止有一員先將一等保送外仍准保送二等一員以足二人之數此項人員於引見時有患病告假扣除者著照侍班不到例議處再遇京堂缺出仍將該員保送不得另行更換如有保送後連次患病告假者該部照例參辦以杜規避其漢員內閣侍讀學士鴻臚寺少卿二項輪用郎中時亦著照此次酌定滿洲人

員章程一律辦理以歸畫一○丁丑諭凱音布鄂山奏勦辦夷匪情形一摺此次兇夷滋事係馬邊雷波所屬且有涼山野夷勾結附和必應兩路夾攻再行進剿茲據奏稱總兵張必祿帶領將弁由走馬坪進攻老林等處險要斬獲無數或分或合計獲勝仗八次提督余步雲齊慎等由那比汛油羅溝進攻千萬貫等處要隘或分投夾擊或併力攻剿計獲勝仗五次每股生擒夷目及燒毀寨落搜獲器械不計其數其餘槍斃跌巖者甚夥並救出被擄民人男婦二百七十餘丁口俱已妥爲安撫辦理甚爲妥協惟此時兩路官兵已在天喜地方會合逼近涼山該夷匪前次膽敢猖獗必當實力痛剿方足以儆兇頑此外尙有吉隆大木干西普庚札易呼等支及起釁之烏拋並乞黑等支亦應一併懲創俾該夷等知所震懾不至甫散復聚著鄂山等嚴飭將弁相機進剿迅速肅

功不可任其窮敝逃竄致有滋蔓所有在事出力文武員弁著該

督等於事竣後覈實保奏候朕施恩毋許冒濫○庚辰趙炳言緣

事降調以梁萼涵爲甘肅布政使調熊常鐸爲浙江按察使以陸

費璵爲直隸按察使

由大順廣道遷

○辛卯大學士公長齡八十生辰晉

封一等威勇公賞

御書扁額福壽字並珍玩文綺○甲午諭御

史胡長庚奏各省保舉過優請量爲裁抑一摺各省首府承審訟

案平反冤獄本係職分所應爲間有勤能之員經該督撫保奏朕

覈其情節量予獎勵並非一經保奏卽予升擢惟用人行政之道

不外賞罰二端卽如清釐積案多起其積壓者何員平反命案幾

起其錯誤者何員均應指名參奏方爲克盡職守若但以保奏市

恩而置聞聃之員於不問殊非覈實辦公之道嗣後各省遇有承

審出力之員該督撫於保奏時將何人任內積壓何人承審錯誤

一併聲敘庶勸懲並用彰瘡兼施可收指臂之效而吏治自蒸蒸日上矣若但以究出實情等語空言保薦斷不能倖邀恩准也○庚子免色喀庫勒被兵回眾歲徵布匹三年○是月貸甘肅金州等九州縣貧民江西南昌等十三縣陝西葭州等五州縣被災籽種口糧倉穀展緩山西岢嵐定襄二州縣江西南昌等十三縣逋賦緩徵甘肅狄道等十七州廳縣陝西葭州等五州縣江蘇高郵等五十四州廳縣衛被災新舊額賦兩淮富安等十一場被水竈地逋課

十二月丁未諭本日據凱音布鄂山由驛馳奏官兵剿辦夷匪情形一摺據稱夷匪以涼山爲逋逃淵藪其中阿合等支地險族繁素多依附見經張必祿等帶兵自天喜地方會合以後先驅剿捕進攻吉薩拉姑依達至夷車壩並月鹿山水本角等處大加剿戮

連獲勝仗余步雲齊慎等亦屯聚要隘備敵各有斬獲經張必祿率領漢屯官兵分爲四路鈔襲直攻巢穴該兇夷納茲膽敢在山頂指揮抗拒被屯守備阿爾烏用槍轟斃官兵乘勢擁上將兇夷必茲石確一併殲斃搶獲殺戮不計其數見在將阿合一支剿洗之後各支夷聞風膽落紛紛投誠叩求免剿隨將獻出被擄男婦分別撫恤並移師至干洛三溪等處盡力搜剿等語該夷匪兇頑性成見經痛剿自必震懾逃竄著鄂山凱音布嚴飭張必祿等務當一鼓殲除毋留餘孽其應續加接剿之處亦著相機妥辦迅速戴功張必祿勦辦勤奮著先行交部從優議敘其在事出力文武員弁著鄂山等查明保奏毋許冒濫至屯守備阿耳烏升途等級應如何鼓勵之處著鄂山等查明具奏候朕施恩○戊申兵部奏議處冊封朝鮮國王妃正副使倭什訥明訓沿途多索車輛照例

議以革職得旨倭什訥著革去侍郎護軍統領仍帶革職留任免

其革退世職明訓著革去內閣學士以三品京堂候補補缺後仍

帶革職留任其沿途濫應該管地方各員著直隸總督盛京將軍

查取職名交部議處○調功普爲兵部右侍郎以德誠爲盛京工

部侍郎

由左副都御史遷

○以李振祐爲內閣學士兼禮部侍郎銜

由左副都御史遷

○甲寅諭鄧廷楨奏子店熬鍋難以限額請照舊辦理一摺

前田陶澍等會籌楚省釐務奏請嚴禁鍋口當有旨令鄧廷楨查

禁永興子店鍋口不准私增茲據該督奏稱粵鹽例准生熟兼銷

永興一帶戶口繁多子店銷熟十倍於銷生且開歇靡常不惟熬

鹽鍋竈斷難定額卽子店多少亦不能定數見在銷數日絀若再

限以鍋口於民食課餉兩有妨礙等語各省釐務漸形疲敝該督

撫鹽政等果能藩籬自固實力緝私既免灌浸之虞自收暢銷之

效若因楚省額引短絀輒更粵省成規限以鍋數不特於兩淮毫無裨益卽粵省釐政轉多窒礙難行所有湖南永興子店行銷粵引著准其仍照舊章實心經理該督惟當隨時體察總以鹽銷之滯旺酌鍋口之減添並著督飭所屬各歸本界認真巡查訪有私梟立即嚴拏懲辦不得稍存畛域之見互相觀望以裕國課而肅釐綱○己未諭軍機大臣等我朝木蘭秋獮原以習勞肄武嘉惠蒙古朕臨御以來向未舉行敬念成規未嘗一日敢忘卽我後世子孫亦當敬謹率由遵守勿替惟熱河爲駐蹕之所一切殿宇房閒規模宏敞閱年既久修理不易前經降旨傳諭該總管等查明寬大處所將應行收貯各件安爲歸併此項房閒毋庸修理因思異日卽舉行舊典駐蹕熱河信宿經臨房閒座落亦無須如許之多其陳設物件看管兵丁及各廟喇嘛等棲止之所均應通盤

籌畫以歸簡易著文慶耆英奉到此旨或審案之暇或結案之後親赴各該處督同該總管等逐一查勘所有陳設等件何者應行歸併存貯何者應行運送來京分別開單隨摺呈覽至房閒既議歸併看管兵丁較爲省便其應撤兵丁嗣後應如何安置或撥給閒田耕種俾資餬口至各廟喇嘛前經理藩院奏明陸續裁撤見在裁撤幾何其廟宇年久傾圯者舊有佛像自應歸併供奉其不堪棲止之廟宇應作何辦理均著該侍郎等悉心體察情形妥議章程據實具奏○庚申以琦琛王璋慶俱爲左副都御史琦琛由鄉王璋慶由光祿寺卿遷太僕寺

○己巳李宗昉丁憂以卓秉恬爲左都御史轉陳官

俊爲吏部左侍郎調龍守正爲吏部右侍郎轉祁寯藻爲戶部左

侍郎調吳其濬爲戶部右侍郎以朱嶠爲兵部左侍郎由內閣學士遷○

是月貸陝西定邊安定二縣來春口糧籽種並緩徵新舊額賦展

緩廣東南海四會二縣貸款○是歲朝鮮琉球暹羅越南來貢○
會計天下民穀數各省通共大小男婦四萬五百九十二萬三千
一百七十四名口各省通共存倉穀三千三十五萬三百一十五
石九斗四升四合七勺

東華續錄

臣王先謙

臣周瀚蕃恭校

道光十八年戊戌春正月甲戌朔諭貝子縣偲逮事 皇祖高宗

純皇帝近支宗室昔日同朕在上書房讀書者見在止伊一人著

加恩晉封多羅貝勒用示朕追懷曩昔篤念宗親至意○命奎照

文慶在軍機大臣上行走○乙亥諭大學士公長齡由部曹荷蒙

皇考仁宗睿皇帝簡膺外任洊歷封圻朕御極後特任綸扉令

在軍機大臣上行走從前乾隆嘉慶年間屢經出師著有勞績道

光六年逆回滋事復帶兵申討克復四城生擒首逆懋著偉功年

來管理部院事務詳慎勤能克盡厥職中外敷歷無愧贊襄上年

因病陳請開缺未允所請朕特親臨視疾諭令安心調理昨因入

十生辰念其宣力多年晉封爲一等威勇公賞賚疊施面加溫諭
方冀春融調理就痊用資倚畀茲聞溘逝實深震悼著加恩入祀
賢良祠賞給陀羅經被並佛一尊經一冊煙壺撤指各一件派奕
紀帶領侍衛十員卽日前往奠醑朕於本月初三日親臨賜奠並
賞給廣儲司庫銀二千五百兩經理喪事任內一切處分悉予開
復應得卹典該部察例具奏其一等公爵著桂輪百日孝滿後承
襲無庸俟年終辦理用示朕軫懷耆舊恩賚有加至意尋賜祭葬
諡文襄○丙子 上臨故大學士公長齡第賜奠賜其孫麟慶員
外郎○乙酉諭凱音布鄂山奏勦辦夷務完竣撤兵歸伍一摺據
稱官兵自青岡普洛移駐欄馬椿六阿娜南地等處進至皎米其
閒夷寨繁多哦雷呷多二支最爲兇悍大木干等支互相依附經
張必祿等直搗巢穴奮力撲擊槍斃賊目斬獲不計其數齊慎余

步雲等併力鈔襲攻奪要隘殲斃夷匪救出被擄民人千餘三溪部落內五家夷人率眾投誠懇求免剿其餘均經一律按緝剿撫兼施計自天喜會合直進涼山蔓延幾及千里見已剿辦完竣等語此次夷匪滋事經張必祿等帶兵攻剿辦理尙爲安速張必祿著賞加提督銜齊慎余步雲著交部從優議敘多歡謝興曉隨營出力著鄂山等查明勞績與在事文武員弁仍遵前旨覈實保奏候朕施恩所調漢屯各官兵著卽分別撤歸原伍傷亡弁兵照例造冊咨部議卹至馬邊一帶嗣後應如何設防雷波一路應辦善後事宜均著該督等飭令經手辦理之員分別親勘覈實妥議章程務期經久盡善以肅邊徼而靖閭閻○是月貸甘肅固原等十州廳縣山西平定等五州縣災民口糧籽種倉穀緩徵直隸景州等四十一州縣江蘇高郵等三十二州縣衛山東德州等三十

三州縣衛甘肅岷州被災新舊正雜額賦

二月癸卯朔命琦善爲文淵閣大學士仍署直隸總督以雲貴總督伊里布協辦大學士仍留任○甲辰上御經筵○乙巳史致儼以病免以祁墀爲刑部尙書怡良爲廣東巡撫調程喬采爲江蘇布政使以唐鑑爲浙江布政使調李象鵬爲貴州按察使以裕謙署江蘇按察使服闋按察使○辛亥命直省改簡道府引見後豫備召見○乙卯以琦琛春佑許乃普俱爲內閣學士兼禮部侍郎銜琦琛由左副都御史春佑由乾清門侍衛許乃普由詹事遷○是月貸陝西懷遠府谷二縣歉收籽種

三月丙戌以京師天氣尙寒命五城展賑一月○丁亥上親耕

藉田○以陶廷杰爲甘肅按察使

由江蘇蘇州府道遷

○戊子上奉皇

太后起鑾謁西陵○免經過地方額賦十分之三○壬辰上

謁 秦陵 秦東陵 昌陵詣 孝穆皇后 孝愼皇后陵寢奠

酒○臨奠端順固倫公主園寢回鑾○乙未 皇太后還京師○

丙申 上幸南苑行圍○己亥諭京師南苑爲我朝肄武之地皇

子皇孫亦於此講武習勤操練弓馬家法相承垂諸久遠斷不可

廢之典乃近年來圍場牲畜甚屬寥寥此皆管理不善之故試思

牲畜以草木爲淵藪若叢林豐草翦伐過甚既無藏匿養育之所

又有盜賊偷竊之虞必致圍獵之時一無牲畜尙復成何事體且

扈從各官有例應攜帶鳥槍者此外影射偷打牲畜必有其人藐

視法度可惡之至卽皇子跟隨人等所帶槍數向來亦無定限難

以查考嗣後苑內草木應如何禁止砍伐扈從各官及皇子跟隨

人等應如何設法稽查酌定限制著御前大臣軍機大臣會同管

理奉宸苑大臣妥議章程具奏○庚子 上還京師○是月貸山

東陵 秦東陵 昌陵詣 孝穆皇后 孝愼皇后陵寢奠

西遼州等十三州廳縣上年歉收倉穀並緩徵渾源等三十七州廳縣通穀

夏四月壬寅諭中福奏請鼓勵勸建書院捐修出力人員一摺書院之設培養人才振興文教係各督撫地方官應辦之事烏魯木齊地處邊陲與內地各省情形不同該都統等惟當講求武備實力操防開墾屯田廣儲糧餉方合足食足兵之道其撫馭商民尤宜示以恩信俾人人知感知奮緩急有資若照各省州縣建立書院之例徒務虛名是重其所輕必致輕其所重又安望其認真訓練克盡職守耶此事勸建之初係由長清誤會諭旨並未專摺具奏富呢揚阿到任後又未詳查奏明請旨均屬不合除長清業經身故無庸議外富呢揚阿著交部議處此次中福摺內並不將前此案由詳細聲敘率爲承辦各員乞恩實屬冒昧著一併交部議

處所有懇請鼓勵之處著不准行○辛亥諭林則徐等奏請將湖南提督常駐辰州府一摺湖南提督統轄全省營伍常德辰州二府俱建有衙署茲據該督等察覈該省形勢辰州較常德地方更爲扼要湖南提督著准其常駐辰州府城以資彈壓其每年應行前赴常德駐紮之處仍由該提督隨時酌量無庸拘定時日○以明訓爲左副都御史品候補三京堂○庚申諭前因富呢揚阿於烏嚕木齊建修書院並不詳查奏明請旨中福摺內不將前此案由詳細聲敘率爲承辦各員乞恩當有旨交部議處茲據該部等查例具奏富呢揚阿中福均議以降二級留任請旨應否抵銷烏嚕木齊地處邊疆全以武備爲重該都統等特膺簡命自當知講求訓練實力操防安輯兵民撫馭回眾俾得有備無患方爲不負委任似此不知所重率以振興文教爲詞勸修書院是舍本逐末必致武

備廢弛安望其悉成動旅緩急有資耶富呢揚阿中福均著不准抵銷嗣後新疆各處將軍都統各大臣等惟當認真教練使人人有勇知方平時則習於戰陣有事則足備干城儻再狃於積習舍實政而務虛名則咎等曠官法難曲貸朕必嚴加懲處以爲喜事好名者戒○癸亥以勦辦臺灣嘉義縣匪徒出力加在籍前任提督王得祿太子太保餘加銜升敘有差○甲子周之琦丁憂以伍長華爲湖北巡撫劉鴻翱爲雲南布政使李鈞爲陝西按察使由河南糧道遷○丙寅賜鈕福保等一百九十四人進士及第出身有差○

丁卯 上閱火器營兵○諭前因御史章煒條陳五城事宜當交吏部會同都察院議奏茲據奏稱吏目本係雜職向例不准擅受民詞若令其於戶婚田土詞訟案件傳人敘供卽與擅受無異再查吏目專係捐納出身流品既雜且久於其任雖有巡城御史稽

查鈐制而御史每年更換防範恐有未周該御史請將城內案件改歸正指揮管理之處不爲無見等語所議甚是嗣後城外案件仍歸副指揮報城城內案件除竊盜鬪毆賭博一切緝捕事宜仍歸吏目分管外其餘戶婚田土詞訟案件向歸吏目管理者均著改歸正指揮衙門詳城聽各該城御史批發覈辦卽鬪毆因戶婚田土起者一切傳人敘供仍歸正指揮管理毋許吏目干預以符體制而專責成○戊辰諭昨據吏部議奏五城事宜業經降旨將城內戶婚田土詞訟案件均改歸正指揮衙門詳城覈辦毋許吏目干預是該正指揮等責任綦重嗣後著巡城御史留心查察如該正指揮等有縱容吏役營私舞弊及才具平庸不能稱職者隨時參奏毋稍姑容儻該吏目等仍有干預擅受情弊亦卽嚴參懲辦以專職守而儆官邪○是月綏徵山西懷仁山陰二縣積欠新

舊額賦展緩山西應州等二十二州廳縣逋數兩淮板浦等三場
逋課

閏四月癸酉諭前據御史阿克丹奏請考試宗室步射以勵人材
當有旨交該衙門會議具奏茲據宗人府議請嗣後照挑選大門
侍衛之例於考驗宗室步射時一體試以騎射等語著各該衙門
卽於本年八月內詳加考驗總不得過一百五十名之數屆時奏
聞請旨閱看所請馬步箭並試之處朕於下屆再行閱看○以王
青蓮爲山東布政使喬用遷爲廣東按察使由甘肅鞏秦階道遷○乙亥諭
翰林院侍讀以下詹事府庶子以下各員著自本月初十日起每
日二員豫備召見如遇外膳日期卽改於次日伺候其餘各員以
次遞推○諭嗣後刑部審辦天主教案無論該犯等改悔與否均
著該部堂官當堂親訊明確其情願改悔者著卽將該犯家內供

奉之十字架令其跨越以昭覈實○丙子 上詣 黑龍潭祈雨

○以左副都御史明訓爲察哈爾副都統○辛巳雨○鴻臚寺卿黃爵滋奏請嚴塞漏卮以培國本近年銀價遞增每銀一兩易制錢一千六百有奇非耗銀於內地實漏銀於外洋蓋自鴉片煙土流入中國粵省奸商勾通巡海兵弁運銀出洋運煙入口查道光三年以前每歲漏銀數百萬兩三年至十一年歲漏銀一千七八百萬兩十一年至十四年歲漏銀二千餘萬兩十四年至今漸漏至三千萬兩此外福建浙江山東天津各海口合之亦數千萬兩日甚一日年復一年誠不知伊於胡底耗銀之多由於販煙之盛販煙之盛由於食煙之眾今如實力查禁必先加重罪名聞紅毛國法有食鴉片煙者必集衆環視繫於竿上以礮擊之入海外夷如是何況中國應請嗣後內地有吸食鴉片煙者限一年內務各

斷絕煙癮如一年後仍然吸食是卽不奉法之亂民俱罪以死論
並嚴飭各督撫轉飭各府州縣清查保甲豫先曉諭居民定於一
年後取具五家鄰右互結如有犯者准令舉發給與優獎儘有密
隱一經查出本犯照新例處死互結之人照例治罪得旨黃爵滋
奏請嚴塞漏卮以培國本一摺著盛京吉林黑龍江將軍直省各
督撫各抒所見妥議章程迅速具奏○甲申諭前降旨飭令御前
大臣等會議南苑章程茲據該大臣等妥議具奏嗣後凡遇臨幸
之時除健銳火器二營派出進班兵一百名仍照例攜帶排槍一
百桿外所有御前乾清門侍衛內兼御鳥槍者准各帶鳥槍一桿
統於派出隨圍後查明確數先行知照御前大臣總理行營大臣
等以備稽查虎槍營之御鳥槍十人仍准各帶鳥槍一桿向有獵
打牲畜野鴨之事著一併禁止以杜影射此外扈從官員人等概

不准攜帶屆期由御前大臣總理行營大臣詳細稽察儻查有私帶鳥槍之員立即指參懲辦至阿哥等學圍時應用鳥槍及諸達所帶鳥槍每阿哥名下止准各帶五桿仍由該門官兵稽查並責成隨往之總詣達散秩大臣管理南苑大臣隨時查察所有隨園人等均不准施放火槍濫射牲獸儻聞有施放槍聲即時查拏究辦苑內開墾地畝過多纂養草束不敷刈割著該管大臣將見種地畝詳查四至丈尺有無浮開等弊仍責成三旗苑丞總領章京及九門章京率同兵丁查有私扒根植之人立即懲辦並著隨時酌量有可拋荒之地陸續拋荒以符舊制至禧恩此次莅任未久從前管理多年朕曾屢加面諭認真整頓自應力挽積習經理妥協乃漫不經心廢弛疏懈咎實難辭禧恩著不必管理奉宸苑事務仍革去三眼花翎賞戴雙眼花翎革去紫纓仍交部議處經此

次訓諭整飭之後該王大臣等務當認真經理力挽積習以復舊規○己丑諭前因禧恩管理南苑未能妥協當經降旨將禧恩革去三眼花翎紫纒並交部議處茲據吏部議請將禧恩降三級調用自係照例辦理禧恩從前管理奉宸苑多年朕屢經面加訓諭令其認真整頓自應妥爲經理力挽頽風乃漫不經心廢弛疏懈咎實難辭禧恩著革去太子太保銜兵部尙書以示懲儆○調成格爲兵部尙書以鄂山爲刑部尙書寶興爲四川總督由盛京將軍遷○庚寅調奕紀爲戶部尙書成格爲禮部尙書奕顥爲兵部尙書由戶部調○以惠吉爲熱河都統調麟魁爲刑部右侍郎以松峻爲盛京刑部侍郎由內閣學士遷○癸巳 上詣靜明園 龍神廟祈雨○丁酉諭禧恩自道光初年卽經朕派令管理奉宸苑事務後緣事撤退旋復令其兼管是禧恩歷任最久受恩深重宜如何實心任事嚴

絕弊端茲據載銓等查出所屬各員那移挂欠種種弊竇豈得諉
爲不知乃竟一味因循毫無整頓孤恩喪良莫此爲甚本應將禮
恩及見任司員等革職審訊重治其罪姑念事隔多年逐款追究
亦屬煩瑣姑不爲已甚之舉著從寬革去經筵講官領侍衛內大
臣閱兵大臣管理理藩院事務都統總管內務府大臣加恩以內
閣學士降補仍管理圓明園八旗事務其餘各項差使著一併革
退以示薄懲其歷任管理及奉宸苑卿並著載銓等查明在任年
月奏請分別議處○戊戌劉彬士以病免轉姚元之爲刑部左侍
郎調吳文銘爲刑部右侍郎沈岐爲禮部右侍郎以許乃普署兵
部右侍郎由內閣學士署○是月緩徵山東德州等二十五州縣歉收新
舊額賦展緩福建積欠鹽課

五月辛丑朔諭昨因僧格林沁奏參親軍扎克達那私赴直隸晉

州知州伊父任所看病當卽查明福克津並未公同商酌畫稿咨
行率行給假已降旨將福克津交部嚴議矣扎克達那身爲親軍
如果私行出境應卽拏交刑部治罪卽使請假省親亦應回明管
轄大臣公同照例覈辦乃止回明福克津一人遽行出京殊屬膽
大扎克達那著卽革退親軍並著琦善派員押解回旗毋許逗留
○丙午 上詣 黑龍潭祈雨○諭福克津於親軍扎克達那請
假時並不公同商酌畫稿咨行率行給假實屬玩法自專擅作威
福著革去領侍衛內大臣都統仍照部議罰世職半俸十二年免
其降調世職○己酉詔刑部清理庶獄○是日雨○庚戌大雨○
召楊簧來京調唐鑑爲江甯布政使以牛鑑爲江蘇布政使服闋
布政
使○癸丑大學士阮元以年老乞休允之賞食半俸○命王鼎爲
東閣大學士仍管刑部調湯金釗爲戶部尙書協辦大學士朱士

彥爲吏部尙書以卓秉恬爲兵部尙書姚元之爲左都御史轉吳文鎔爲刑部左侍郎以許乃普爲刑部右侍郎

由內閣學士遷

○丁巳雲

貴總督伊里布等奏緬甸國王孟旣襲國已久見因病廢欲讓與其弟孟薩鴉佈低襲國近復有親屬目官鬩鬧之事前曾遣目至九龍江欲令車里土司帶練赴緬鎮撫令迤南道會鎮曉諭該目告以內地土司從不越赴外域報聞○癸亥諭昨據都察院奏民婦穆陳氏以伊夫穆齊賢在惇親王府內囚禁等詞前赴該衙門呈控當卽派載銓奕紀聯順隆文分往惇親王寓園府第將單開各犯按名查拏本日據載銓等覆奏並開單呈覽所有寓園起獲原單有名者十三名單內無名者三人府第起獲原單有名者三十一名單內無名者二十九名及見獲之全順卽安保全路卽定保希孟著交軍機大臣會同刑部隔別嚴訊務期水落石出斷不

准稍有不實不盡其未獲之太監李秋澄並寓園單內有名未獲之扎拉杭阿王姓張三大監王安府第單內有名未獲之壽普全安塔克清阿曹姓柳姓德隆太監龐眉張如瓶著步軍統領衙門順天府五城迅卽嚴拏務獲歸案審辦○乙丑予故大學士原任伊犁將軍長齡入祀惠遠城祠○丙寅諭昨日因都察院奏民婦穆陳氏呈控惇親王府第寓園囚禁多人當卽派戰銓等前往分查起獲各名較之所控單內幾至兩倍見已交軍機大臣會同刑部審訊該王理應具摺請罪乃於次日呈遞摺件並求召見朕未經允准本日朕在出入賢良門閱看兵部引見人員該王亦未免冠叩頭請罪實屬膽大無禮惇親王縣愷著交宗人府先行議處嗣後該王如有呈遞摺件奏事處不准接收儻在軍機處遞呈軍機大臣等亦不准接收○戊辰諭前經降旨將惇親王縣愷先行

交宗人府議處茲據敬敏等定議具奏縣愷著革去內廷行走宗令都統閱兵及各項差使仍照議實罰親王俸三年不准抵銷○是月緩徵山東德州等三十州縣衛被旱新舊額賦

六月辛未免四川夷匪滋擾之馬邊雷波二廳逋賦及各廠應解銅鉛○乙亥諭前因惇親王府第寓園囚禁多人當降旨飭令軍機大臣會同刑部審訊茲據會審具奏惇親王縣愷既違例囚禁多人復將優伶藏匿府內並令拴住等冒名引見又將部庫領出官員俸銀罰扣抵補私虧卑鄙謬妄怙過不悛實出情理之外縣愷著交宗人府嚴加議處太監李秋澄違禁吸食鴉片煙並令閩府官員兵丁等站道請安復將護衛郭升阿等擅責又將郭隆阿尙安太私園私放實屬目無法紀李秋澄著枷號兩箇月滿日發往黑龍江給兵丁爲奴遇赦不赦優人全順全祿著交兵部連伊

家屬一併遞回原籍蘇州折責交地方官嚴加管束毋許潛行回京滋事至被禁之富安等八十二名見經訊明均因細故被禁不必再行羈累著交各該管衙門分別保領所有包衣哈琅阿並其家屬及太監人等均著各該衙門妥議辦理民人飭令回籍以上各名俱不准再回該王府當差其閘板房二處卽著拆毀此外僮仍有關禁之人著該王迅卽釋放毋稍拘留餘依議○丁丑諭前因惇親王蘇愷違例囚禁多人等款降旨交宗人府嚴加議處茲據該衙門議以革去王爵實屬咎所應得姑從寬革去親王降爲郡王並革去紅絨結頂金黃蟒袍以示懲儆○己卯以趙炳言爲江西布政使劉韻珂爲廣西按察使服闋按察使○甲申諭向來各親郡王貝勒貝子公等所屬哈琅阿名數自有一定近查頗有多寡不齊總因遞襲之後未經詳細查辦以致參差其應如何定限畫

一之處著宗人府悉心妥議章程具奏嗣後八旗官員人等文職自四品以上武職自二品以上其本戶均毋庸作爲哈喇阿以示區別著爲令○丙戌沈維鐫以病免轉廖鴻荃爲工部左侍郎以李振祐爲工部右侍郎

由內閣學士遷

○甲午諭軍機大臣等據凱音布

等奏雷波馬邊廳等處窮夷近因播種失時潛至沿邊一帶搶掠居民糧食牲畜該文武督率兵勇擊斃多夷並擒獲漢奸兇夷就地正法附近老林處所尙復時出窺伺等語此等猥夷上年甫經大兵戡定自應震懾天威照常安業何以閱時未久卽有搶掠情事難保無內地漢奸從中勾結見經該將軍等酌調官兵並招募鄉勇派委文武各員弁馳詣緊要隘口加意防堵所派究係何員自應奏明並飭令確切查究係何支何夷起意出掠並有無肇釁之處相機迅速妥辦毋得遲誤致令日久蔓延儻將就完結釀成

邊患是該將軍等前此辦理不善未能永就肅清咎無可辭斷不能再邀寬典也○召阿勒清阿來京以熊常鐸爲廣東布政使周

開麒爲浙江按察使

由山東鹽運使遷

○乙未諭前因歷任管理奉宸苑

大臣及奉宸苑卿開墾租出地畝並失察那移挂欠錢糧降旨著該部分別議處茲據該部按照地畝多寡失察年月久暫照例擬議開單呈覽所有休致都統那彥寶著照部議革去頂帶內閣學士禧恩部議降四級調用之案著加恩改爲革職留任十年無過方准開復仍帶降四級留任革職留任吏部左侍郎桂翰部議降三級調用之案著加恩改爲革職留任八年無過方准開復仍帶降三級留任已革甯夏將軍英和著照部議降二級調用並革職留任註冊其另片奏嘉慶十年以前應得革職處分並著照議以革職註冊頭等侍衛景行部議降二級調用之案著加恩改爲革

職留任六年無過方准開復仍帶降三級留任餘著照所議辦理
此案降級留任之處均不准其抵銷○是月給貴州鎮遠府屬被
水兵民口糧緩徵直隸阜城縣被旱本年額賦